

Wosi Phawulos Hepsa Wosina **Wosiya** **Qoronxoski asuni Meyak** **Gachgiru**

Phawulos Qoronxoski asuni meyakini tichina hepsani wosiyaas tichchenaas Qoronxosuk fa betekiristaniis barneen ane fa isar sinaas akamanon rakko sinna faana kabaasikwa. Isa isa betekiristaniissi feese meya Phawulosnin akamanon tugga'et feeseter sinfanaknu ganoni chowa ephphe yook akamanon sholere feer sinbaasontu besifa. Es bar sinfana kabaasik akama gira gironamatotu makefe.

Wosibaasi tesuni kifliista Phawulos Qoronxosuk fa betekiristaniisneen ane fa isar sinaason makefaat betekiristaniissi kabi me'aasewa tugga'oose asik awuni boor'a chima wolgu imnamatotu besifa. Es barneen ane tusire basa chima ke'oos harmusoneknawa ganoni ugnaasi baassotin zoonsinamato girabaason besife. Tusire dey Yuudak feese kiristanani meyanon argasuk girak imonek baassok kiitit feer. Koi'ni eddeesikitossi dey Phawulos wosi sinbaasik futoni wosi innowa yisefe garo asuni meya tugga'esete boor'a baassok wolguba imi.

Matsafaas Sirki Ephobaas

Gachgiru 1:1-11

Phawulosnawa Qoronxoski asuni meena 1:12–7:16

Yuudak feese kiristanani meeni argasu 8:1–9:15
Phawulos wosi sinbaasi ha'suni hugnaasta kabi
tugga'oosik imna wolgu 10:1–13:10
Koor'uba 13:11-14

¹ Ha'oosi fiqadik Yesus Kiristoosni wosi sina Phawulosnikinnawa ayni sina Ximotiyosnikinna; Qoronxosuk fa betekiristaniisiknawa esiisimato Akayani daa zuuttambaase asiista feese kiristanani meya zuuttambesiise asikna;

² Abani sina Ha'oniiskin; Daam Yesus Kiristoosnikin Ha'oosi otumnawa nagane nittok sinfawungwa.

Phawulos Ha'oosik Imna Galata

³ Fakini abaasiknawa innok chimaason zuutira imfa barikna dey Daamni Yesus Kiristoosni aba Ha'oosik galata sinfawungwa.

⁴ Inno Ha'ooskin danfeni chimaasik shanaassi feese baasso zuuttambesiise asin chinunik Ha'oos innoosta kar'fa shana zuuttambaase asik innotin chinifa.

⁵ Kiristoosni shanaasi showonon haa'enisimato basa chinuson dey daysira danani.

⁶ Inno shanaason ephpha taafeni kabaasik nitto chimnawa farune asin daneti. Inno chimfeni kabaasik nitto dey inno ephphataani shanaasne fayiison fakiyak ephpha taara chimatiwa.

⁷ Innoosta kar'a shanaason haa'etiisne faaron inno chimaason dey haa'otimato arifeni boor'a nittoosta fa abдиниis akamawa.

⁸ Ayni meyane! Iisiyaki daasta faani kabaasik innoosta kar'a shanaason arusotik sholefeniwa. Es innoosta kar'a shanaas wor'ak chimnoyni faya

sinna boor'a kaak fooni abdiisnu innoostan budi-ratu fa.

⁹ Esiisimato kituni mangsuni kar'a innoosta katenarne faar sinnatu innok beste, Es bar zuut-tambaase innoosta kar'anaas amanefeniis kituni meyanon kitun kabgifa Ha'oosontano inno hug-naasikta sina beybaason yaadatonikwa.

¹⁰ Es bari boor'a bar kituta katuni adagaassin innotin fu'e; dey fu'ona; hanneen dey innotin fu'onamato abдиниis basaastawa.

¹¹ Nitto dey innotin shiiphontiisik argasutik sholsifawa. Akama shiiphosik inno Ha'oosi argasunon danfeni kabaasik showo asuni meya dey inno boor'a Ha'ooson galattesezewa.

Phawulos Koppobaason Soole

¹² Ese inno teetonik sholsi wuzaas haniiswa; es bar dey futo sinbaason kanuniis innok zalawa; oom asuni meyakinnawa arkiron dey nittoneen ane fa isarniis Ha'ooskin danni kor-toosewa ma'aase asiistatu zagira yere. Es bar dey sinnaas Ha'oosi otmaktano asuni techmaktawa.

¹³ Feretira yaadatotik chimati wuzasontu tich-intano isanne ooma wuza aane tichuweniwa. Zuttambaase asin yaadatotik chimatimato abdi zagifawungwa.

¹⁴ Hash inno chowaasik arifetiis baggawa; sinuntano orfo mai'sira yaadatotimato abdi zagifawungwa. Es bari boor'a Daam Yesus yoona wono inno nittok teetefeniisimato nitto dey innok teetoti.

¹⁵ Es baron mai'sira arina boor'a hep kushunon nittok ke'anakwa iyaat zeemman nittotin yaara biyanak koppa'era faanar.

¹⁶ Nittotin biyanak koppa'enaas Meqedoniya hamfana kabaasiknawa estan wolla yaafana kabaasiknawa. Esiisik Yuudani daa hamana ugunnaasik taan argasutik safarera faanarwa.

¹⁷ Es baron koppa'era kabifana kabaasik awu zagunak sholsinamato arunoy ek hang yit fe asune feer sinna nittok bestewoso? Wedey es baron koppa'onaasik: «Ee! Wedey Indaane» yit ek hang uuk asuni safarak zaginarne faar sinna nittok bestewoso?

¹⁸ Ha'oos amanamto sinna boor'a inno dey nittok makefeniis: «Ee! dey Indaane!» yifa ek hang uni kaamaktawa.

¹⁹ Taanawa Sillaasna dey Ximotiyos Ha'oosi Naa Yesus Kiristoosnin nittok makeniis wonna wonna: «Ee!» yifa kaamak koi'batano: «Ee! wedey Indaane» yifa ek hang uni kaamaasik aafa sinanawuza.

²⁰ Ha'oos innok imna abdiis zuuttera: «Ee!» Sinanaas Kiristoosniki kamowa; es bari boor'atu Ha'oosi ulfinak Kiristoosniki kamo: «Aamin» yifeniwa.

²¹ Innotinnawa nittotinna Kiristoosnik chimma yeronik zagiis Ha'ooswa; wostok innotin koriis dey barwa.

²² Basar sinniisik zaala sinni maatamaason innoosta icha barewa hanneen innok imtoni otmaasik nibniissi Korto Ayyanabaason waasi zagira innok imaas barwa.

²³ Ta wolla Qoroxos yoo beynaas nitto sumotik aafa zaguna wuza yira nittok kenashtefaatawa; es barik dey Ha'oos taak zaalawa.

²⁴ Nitto amantontiisik chim sineti boor'a nittotin girsunik nittoneen ane wostonistano aman-

tontiisik aafa nittotin ajajoni wuza.

2

¹ Ese nitto suumotik zagunoynamato safarok nittotin biyak wolla aafa yoonawuza yira buggin.

² Awune faaron ta nitto suumotik zagu bey-fanaknu nittoteno oom taan girsunir oonso?

³ Zeemmanittok ekka tichinaas nittoki yaafana kabaasik taan girsusonek sholsina baasso ta suumonak zagsonoytemato iyaatwa. Ta giraas nitto zuuttamnitiise asi gira sinbaason amane-fawungwa.

⁴ Akama suumoknawa nibnaassi rakkaterana dey akama harafa waasit han tichaason tichinaas akamanon nittotin shunnar sinnamato arutik iyaattano nitto suumotik zagunak yiratawa.

Miir'efe Barin Feeshun Uu

⁵ Asunin suumonak zagir oonu feefaanane suumonak zaginaas taan taan sinnoynaron zuuttamnitiise asingwa; chowaason arkissinartawa; nitto ganeyaassinnu showoni meyanontu suumosonek zagiwa.

⁶ Es effe asusik nitto ganeyaassin showoni meya basaasta mangsu kar'ete ke'oos barik hooronawa.

⁷ Es bari boor'a es asus akamanon suumobaastan kabi chowa abdi buggunoynamato feeshun yira barin chinutik sholsifawa.

⁸ Esiisimato barin shuntir sinnitiison hepsa wolla barik besutik nittotin shiiphefawungwa.

⁹ Es wosiyaason dey nittok tichinaas fattantera zuuttambaase asik ajajamer sinnitiison arunak sholefaatwa.

¹⁰ Nitto feeshun yiseti asusin ta dey barik feeshun unawa. Feeshun una miir'aba faafaanane ta Kiristoosni sinak barin feeshun unaas nitto boor'awa.

¹¹ Es baron dey zagifeniis Sexanaasi kopponon arifeni boor'a Sexanaas innotin eshnoynamatawa.

Phawulosni Rakko Xiroaddak

¹² Esseen orfo Kiristoosni misirachchuni kaa-maason makonak Xiroadda hamfana kabaasik Daamiis taga wostoni ugna taak gachi.

¹³ Sinuntano ayta Tiitonin aane danut sinna boor'a ayyananaas beysa aane dana. Es bari boor'a esta feese kiristanani meyanon maar'o duuti iyaat Meqedoniya hamin.

¹⁴ Sinuntano wonna wonna Kiristoos merena barik innotin zoonsira ma'a sawubare yere shittonimato Kiristoosni chowaasik fa aruuson daadaassi katunik zagifa Ha'oosik galata sinfawungwa.

¹⁵ Inno faruni baassok sinfanak tishuni baassok ma'a sawuba faanar sinna Kiristoosniki kamo Ha'oosiki tai'niwa.

¹⁶ Inno isaasik worifa kituni sawa sawunir; oomiisik kaa imfa kaani sawa sawunir; eekan han wostoosik hooro sinnir oonso?

¹⁷ Inno Ha'oosi kaamanon nagadni koda zagire shelgire nagadesefe showo meenimatotawa; sinuntano Ha'ooskin woste ma'a wosi sinna Kiristoosniki kamo Ha'oosi sina makefeniwa.

3

Gaddo Teyyaasi Wostinyani Meya

¹ Hepsa wolla inno teetniison galattonik kabuniroso? Wedey isa isa meya zagisefesimato

nittok wedey nittokin tichche argasuni ticha innok sholsungaso?

² Asu zuuttere arifenaasewa feretit feenaase inno nibaassi tichche inno argasuni tichaas nit-towa.

³ Nitto dey inno wostoosik yeese Kiristoosni wosiya sinnitiis ammawa. Han wosiyaas tichchenaas hayewa Ha'oosi Ayyanaktano kalamiktawa. Esiisimato asuni danara nibaastatano danara shu'aasta tichchertawa.

⁴ Es baron makenaas Kiristoosniki kamo Ha'oosta amantoni faar sinna boor'awa.

⁵ Wostoniison koi'suk chimanik hooro zaguniis Ha'oostano inno teetniisik isa wuzane zagunik chimni aafawa.

⁶ Gaddo teyyaasi wostinynya sinanik hugna innok imaas barwa. Esiis dey mallatok tichche tumasik sinnoynaron Korto Ayyanaasi argasukwa. Mallatok tichche tumaas kitu tesher. Sinuntano Korto Ayyanaas kaa imar.

⁷ Tuma tumtenaas danara shu'aasta malatokwa. Tumaas imtena kabaasik fa chaarefaas tishit hamar sinfanaknu Israelni daraas Museni sinaason mai'sire biyak aane chimoto. Ese kituuson ephpha ya tumaas effatena ulfinak yaananneen,

⁸ Eekan Korto Ayyanaaski kamo beste wostoos akamanon ulfinba aafano foona wuza?

⁹ Asuni meya boor' sinete wostoos effatenaron ulfinba faar sinnanneen asuni meya ooko sinone wostoos aakkak akamanon ulfinba fo beynirinso?

¹⁰ Orfoti ulfinaas akamanon arkir sinbaastan kabi chowa aatta ulfinaas isanne aafane faar sin-natu faadtona.

¹¹ Es xaqxaqit hama bar effatena ulfinba faar

sinnanneen koi'ba foontonon chimma fooni bar aakkak akamanon ulfinba fo beynirin?

¹² Effatena abдини faana boor'atu digo beyfeni.

¹³ Hopit hama Museni sinaasi palpalu tishuna kabaneen Israelni meya biisonoytemato sinbaason uket feer, Sinuntano inno esiisimatotewa.

¹⁴ Baasso nibaas futoosik tachiwa, Hash hawungneen kar'a kur'u teyyaasi matsafanon feretisefe kabaasik nibbesiis es yinusik geeptobesiisetu feesetewa, Es yinuus tishunaas Kiristoosniki kamo koi'bawa.

¹⁵ Hashneen kar'a tumaasi matsafanon feretisefe kabaasik nibbesiis es yinusik geeptefawa.

¹⁶ Sinuntano asu Daamiiski wolifena kabaasiktu es yinuus kabuna.

¹⁷ Daamiis Ayyanawa; Daamiisa Ayyana faana dimaastak birmadummaas faarwa.

¹⁸ Inno zuuttamniise geeptonoy sinak faafaat inkaliissi biistefanaasimato Daamiisa ulfinanon palpalgira besuniwa. Inno Ayyana sina Daamiisa gitonon sinne bestok ulfinaastan ulfinata sooltoniwa.

4

Amanamto Sinne Wosto

¹ Ha'oos fakibaasik han bari wostooson innok imna boor'a abdi aafa bugguniwuz.

² Aacho sina baronnawa iichu sina wuzasonna beyni, jallisuk aafa wostoniwuz, Ha'oosi kaamanon dey aafa sooloni wuz, Es baristan futooson ammanon kisiratu besuni, teetniison asu zuuttambaase asi kanuk Ha'oosi sina amma zagifeni.

³ Inno assini misirachchuni kaamaas awuzakne aacho sinfanaknu aachenaas tishuni baassokwa.

4 Han daasi ha'sinynya sina Sexanaas amanonoy asuni meeni nibaason taar'i, Es bari boor'a Ha'oosi gitok ammanon beste Kiristoosni ulfinani misirachchuni kaamaas chaarsuna chaarefaason biyyosonoytemato zagi.

5 Inno assifeniis Yesus Kiristoos Daam sinbaasonnawa inno teetniisik Yesusni chowaasik nitto wostinynya sinniisontano inno teetaasi chowanon aafa makoni wuza.

6 «Chaarefaas talmaassin kessa chaaron» yira make Ha'oos Kiristoosni gitoosik chaarsifa Ha'oosi ulfinanon aruni chaarefa innok imanak chaarefbaas nibniissi chaaronak zagi.

7 Sinuntano han zuuttambaase asiistan denalo sina hugnaas Ha'oosirtano innor sinna beybaason artonak han ulfinto wuzason hoocho kodaassi faarwa.

8 Shanaas daa daassin innoosta kar'fa; sinuntano aafa mertoni wuza; showo wona zaguniwuza tishifa; Sinuntano abdi aane buggifeni.

9 Gumaniis innotin kalle kofuksefe; sinuntano wadajanin turkira aane biyeni; ichchera ha'tet faanir; sinuntano aane kitifeni.

10 Yesusni kaas inno atuusta ammanon kessa bestonak Yesusni kituuson inno dey atuniista wonna wonna wor'aat kutifeni.

11 Yesusni kaas kituni atuniista ammanon kessa bestonak hayew sina inno Yesusni chowaasik wonna wonna kituk aattera imtenir.

12 Es bari boor'a kituus innoosta wostedifar; sinuntano kaas nittoossi wostedifar.

13 Sinfanaknu: «Amanen; es bari boor'a dey maken» yistera tichchenaasimato inno dey es isa amantoni Ayyanaas innoossi faana boor'a amane-feni; dey es bari boor'a makefeni.

¹⁴ Daam Yesusnin kitun kabgi Ha'oos innotin dey Yesusneen ane kitun kabgunamatona nitoneen ane dey bari sina yeetunamatona arifeniwa.

¹⁵ Es bar zuuttambaase nittok ke'nir sina Ha'oosi otma tuumma fui'tera showo asuni meyak kar'fana kabaasik Ha'oosik sinni galataas arkunakwa.

Amantok Fo

¹⁶ Es bari boor'a abdi aafa bugguniwuz; awune faaronnu geroki atuniis tishifanaknu sirki atuniis wonna wonna gaddo sinnatu fa.

¹⁷ Han kashosewa hashti kabaasire sina shananiis barik kixxatoni wuzaba foonto ko'ini akama ulfinaason dananik zaguna.

¹⁸ Inno oodet faaniis biistonoy wuzasontano biistefa wuzaasontawa; biistefa bar hashtirwa; sinuntano biistonoy bar koi'ba foontowa.

5

¹ Han durkanisimato hashti kabnir sina han daastaki ashniis bogtefana kabaasik asuni kushuk keetonor Ha'oni kushuk keete koi'ba foonto fooni keya samak faanamato arifeniwa.

² Es kabaneen samaki atuuson mayanik kaltok kabet faanirwa.

³ Es baron mayfeni kabaasik atatu sinna aafa bestoni wuza.

⁴ Han daastaki durkanisimato sina atuniisik faani kabaasik fayfaan haanet faanirwa; haanet faaniis kituus kaak sooltonak samaki atuuson mayaniktano han daastaki ashniistan oor kesanik sholefaattawa.

⁵ Es barik innotin hoossiis Ha'ooswa; es baristan denalo innok imtoniwuza zuuttambaase asik ooto sinanak Ayyanabaason innok imaas barwa.

⁶ Han daasta ashak faani kabaasik Daamiisan tan wokka fooniison arifeniknu wonna wonna bariktu amanefeniwa.

⁷ Inno faafeni foos Daamiisin amantoktano barin biiratawa.

⁸ Ashniistan oor kessa Daamiiski fa keeniissi foos innok ma'arwa; es bari boor'a amantoktu faafeniwa.

⁹ Han ashniisnen faafenik wedey oor kesfenik inno sholeniis Daamiisin girsuwa.

¹⁰ Asu isarba isarbaasik han daasta feena kabaasik mangu wosto sinun ma'ar wostobaasik waagbaason ephphetoonak inno zuuttamniise Kiristoosni mangsuni kar'ni kodaasi sina ta'anirwa.

¹¹ Daamiisin digoos awu sinnamato arifeni boor'a asuni meya ephphetoosonek zagifeni. Inno oo sinnimato Ha'oos arifawa; nitto dey nibnitiissi inno oo sinnimato arsefetimato abdi zagifawungwa.

¹² Nibesiissi fa barik sinnoynaron biistefa barik teeteseфе baassok wolgu ima chimatiktu innok teetotik zagunitano hepsa wolla inno innotin nitto sina aafa galattoni wuza.

¹³ Nifaso sinfenik Ha'oosik iyaatwa; kanubare yere asu sinfenik nittok iyaatwa.

¹⁴ Isarga Kiristoos asu zuuttambaase asik kitubaasonnawa zuuttere kitisetemato arini boor'ana Kiristoosni keeshtanaas wostonik giddisifawa.

¹⁵ Kaak feese baasso kiti bariknawa kitun dey kabi barikna foosonektano hanneen ekalok

baasso teetaasik foosonoytemato Kiristoos zuuttambesiise asik kiti.

¹⁶ Hanneen ekalok inno ooninnu ashni safarak aafawa biyaniwuz. Zeemo sinak Kiristoosnin mazaneniis baaki asunimato ashni aafak sinfaanane yooni wonaasik ekka aafa mazanoniwuz.

¹⁷ Es bari boor'a oonu Kiristoosnir sinfaanane gaddo testowa; kur'u testoos aati es bari eddeessi gaddo testo giri.

¹⁸ Es bar zuuttambaase sinnaas innotin barneen ane Kiristoosniki kamo gansira gansuni wosto innok ima Ha'ooskingwa.

¹⁹ Esiis dey Ha'oos Kiristoosniki kamo han daastaki asuni meyanon zuuttira barneen ane gansi uwa. Mangsubesiison aane faaduwa; dey asusin Daamiisneen ane gansuni kaama innok imi.

²⁰ Ha'oos asuni meyanon innoki kamo teegonir sinna boor'a inno Kiristoosni kaamaasi ambaderiwa. Es bari boor'a: «Ha'oosneen ganoti» yira Kiristoosni sunaasik shiiphefeniwa.

²¹ Inno Kiristoosniki kamo Ha'oosi ookonon haa'er sinanik Ha'oos boor'ba foonto Kiristoosnin inno boor'aason bar wor'anak zagi.

6

¹ Ha'oosneen ane wostet faanir sinniisimato nitto ephpha taati Ha'oosi otmanon ke'nor zagira fu'otiitawa yira shiiphefeniwa.

² Ha'oos:

«Sholsu sa'atiista neen oden;

faruni wonaasta neen argasin!» yifana boor'a.

«Ese sholsu wonaas hashwa; faruni wonaas dey hashwa.»

Phawulos Ephpheteena Shana

³ Inno wostefeni Ha'oosi wosto kashistonoy-namato isa wuzakne ooniknu tuusa aafa siinani wuza.

⁴ Es baristan shanaasonnawa rakkoosonna dey tiir'oson fakit Ha'oni wostinynyanimato teetni-ison zuuttambaase asik Ha'oosik tai'sidifeniwa.

⁵ Ha'oni wostinynya sinniison ammanon kisira besuniis ichchok, taatok, rakkatok, wosto wostere hopuk afay'nin turkuknawa maktoknawa.

⁶ Esiisimato dey kaymak, aruk, fakiyak, ma'ak, Korto Ayyanaasik zoonustoknawa tane fe asu aafe uba foonto keeshtanakna;

⁷ Futoni kaamaasiknawa Ha'oosi hugnakna ookooson alda kushuknawa hoi'ta kushukna neeboni meya zagira ephpha;

⁸ Ulfinaknawa salphinakna, waqastoknawa galatni danaknatu faani. Futonir sinna faani eshar yisteni.

⁹ Arto sinna faani artonor sinni; kitisetewa yistefenik hayew sinnatu bestefeni, ichchefeniknu aane wortoweni.

¹⁰ Suumo innoosta kar'fanaknu wonna wonna giret faanir; tukam sinna faagedo showoni meyanon otum zaginir; isa wuzni foonto sinna faafenik zuuttambaase innokik faar.

¹¹ Nitto Qoronxosuk feese asuni meyanee! Ese ammanon nittok makeniwa; nibniison taggira nittok gachniwa.

¹² Nittotu keeshtannitiison kaletteno inno keeshtanniison aane kaleniwa.

¹³ Aba naanggotbaasik makefenaaysimato makefaat kessa inno nibniison taggira sirki safaraniison ammanon gachcha besinisimato

nitto dey ekka zaguti.

Amanonoy Asuni Meyaneen Isar Sina Beya

¹⁴ Sinnoy ugnak amanonoy asuni meyanee ane isa waanjosi girutiitawa. Ookonewa boor'ne aakkak isar sinak chimnirinso? Chaarefasewa talmaase aakkak isa daa fook chimnirinso?

¹⁵ Kiristoosnawa Dabulosna aakkak isar sinak chimonerinso? Amane baassotnawa amanonoy baassotna aakkak isar sinak chimonerinso?

¹⁶ Ha'oosi betemeqdesiis koo'loosikitoneen ane awuni isarba faarinso? Ha'oos dey;

«Foona dimaason darataasa ganesi zaguna;

baassoneen ane foona;

ta baassok Ha'obesi sinana;

baasso dey taak darata sinone.»

yira makenaasimato inno hayewa Ha'oosi betemeqdesiwa.

¹⁷ Dey Daamiis:

«Baasso ganeyaassin kortera oor kesti;

zina sina wuzason ta'utiita;

ta dey nittotin ephphatoona;

¹⁸ Ta nittok aba sinana;

nitto dey taak arqa naanggotnawa;

mashka naanggotne sinati;

yifawa zuuttambaase asin chimfa Ha'oos»

yiwa.

7

¹ Ese koontaasakitono! Es abdiis zuuttambaase imtenaas innok sinna boor'a ashasonnawa Ayyanaasonna asin kiinsuni wuzaassin teetniison kayimsuniwa; Ha'ooson digok dey korto sinniison tuuma sinanak zaguni.

Phawulosni Gira

² Nibnitiissin innotin ephphatootiwa; inno ooninnu aane miir'oweniwa; ooninnu mangussi aane zoonuweni; oonikinnu ephpha innok ke'anak aane zaguweni.

³ Es baron yifanaas nittoosta mangsu kar'anaktawa; zeemo sinak makenaasimato nitto inno nibaassitu faasetiwa; es bari boor'a kaak sinun kituk nittoostan aafa oor kesani wuza.

⁴ Nittoosta fa amantonaas akamawa; nittoosta teetefana teetoos inyawa; nittoki kamotu chima danfawungwa; innoosta kar'fa shana zuuttambaase asik akamanontu girefawungwa.

⁵ Megedoniya hamma kar'feni kabaasiknu showo ugnan rakko innoosta kar'naastano isa beysa aane daneni; gerok faasso nibniissik dey digatu innoosta kar'ar.

⁶ Sinuntano suume baassotin chinifa Ha'oos Titioni yoosik innotin chini.

⁷ Chimniis bar yeena bar barik sinnoynamato nitto barin chiniti baron odeni boor'aneengwa. Nitto taak safaret faaseti kaltanaasewa suumoose asin innok makena kabaasik daysira girengwa.

⁸ Zeemo sinak nittok tichina wosiyaas nitto suumotik zagir sinfanaknu es wosiyaason tichunaasik aafa gaabbona wuza; gaabbefanaknu gaabbenaas tichina wosiyaas nittotin garo wonniron suumotik zagina boor'awa.

⁹ Sinuntano hash girengwa; es girenaas nitto suumotik zagina boor'a sinnoynamato suumeti suumoosik harmiti boor'awa; ese suumontiis Ha'oosi fiqadinimato sinna boor'a inno isanne aane nittotin miir'oweniwa uwa.

¹⁰ Ha'oosi fiqadinimato sina suumoos faruni ugnaaski zoonsifa harmuk bestefa sooltoson teshefana boor'a aane gaabbisifawa. Sinuntano han daastaki suumoos kitutu ephpha yaafa.

¹¹ Han suumontiis Ha'oosi fiqadik sinbaasik aakkane fa mamsuni wolguuson, aakkane fa chimaason, aakkane fa tai'nin gi'tooson, aakkane fa digaason, aakkane fa kaltanaason, aakkane fa koonaaason, aakkane fa ke'o nittoosta ephpha yaanamato gasasira biitiwa. Nitto dey zuuttambaase asik es chowaassi aafsetiwa.

¹² Es bari boor'a awune faaronnu nittok tichifanak ta nittok tichinaas inno chowaasik fa chimaas Ha'oosi sina amma sinanak iyaattano miir'e asusiknawa miir'ame asusikna iyaattawa.

¹³ Chima dannistan denalo Tiito danna giraasik daysira gireniwa; es gireniis dey zuuttamnitiise Tiitonin chiniseti boor'anawa ayyanabaas beysa dananak zagiseti boor'anawa.

¹⁴ Nittoosta fa teetonaason Tiitonik makera faanar. Nitto dey ta iichchonak aane zaguweti. Inno wonna wonna nittok futooson maket faanir. Esiis dey nitto chowaason Tiitonik makeni teetoniis futo sinbaas artewa.

¹⁵ Zuuttamnitiise ajajametir sintimatonawa; digak, korkukna dey ephpha taatimatona Tiito yaadatefena kabaasik nittok fa keeshtambaas akama siniwa.

¹⁶ Ta dey zuuttambaase asik nittotin amantok chimnaasik daysira girengwa.

8

Kiristanani Meeni Ima

¹ Ayni meylene! Meqedoniyak faase betekiris-taniisikitok Ha'oos imna bari otmaason arusotik sholefeniwa.

² Baasso showo shanak fattantesetewa. Sinuntano girabesiis akamawa; akamanon tukam sinefeknu akama imatu imete.

³ Chimeteesne faaronnawa baasso chimaastan denalo fiqadibesiisik imetemato ta zaal sinanawa.

⁴ Yuudak feese kiristanani meyanon argasuni hugna kalnoynimato mai'siretu shiiphste.

⁵ Baasso zagsetees inno oodni baristan denalowa. Zeemme teetbesiison Daamiisik imete; tusire dey Ha'oosi fiqadik teetbesiison innok imete.

⁶ Han wostooson zeemme wostees Tiito sinna boor'a hashnu es imni wostontiison taamme koi'baasta katunak barin shiipheniwa.

⁷ Nitto amantok, wollak, aruk, chimme wostok, innok dey besiseti keeshtana zuuttambaase asi denalo sinti; han imni wostoosik dey denalo sintiwa.

⁸ Ese han baron makefanaas nittotin ajajonaktawa. Sinuntano oomni meya imefe imaasewa nitto imefeti imaase asin hoossira nitto keesh-tanaas futo sinbaason arunakwa iyaatwa.

⁹ Nitto Daamni Yesus Kiristoosni otmaason arsetirwa. Bar awune faaron otum sinfenak basa tukam sinaasik nitto otum sinatik bar nittok iyaatwa tukam sini.

¹⁰ Es chowaasik nittok ma'ar sinna taak beste kiito nittok imfawungwa. Aata woggaassik ima koi'ba sinnoynaron es baron zeemme zaguk sholees nittowa.

¹¹ Es bari boor'a asunik imak sholeti safarantiis wostota feeshsha koi'baasta kar'anak nitto chimtiisne faaron es safareti baron hash zaguti.

¹² Asunik imanak ma'a fiqadiba faafaanane es asusa ima oodtera taaster sinanaas basa hugnaasne faaron imanenetano barki foontoson imfena kabaasiktawa.

¹³ Es baro yifanaas nitto zuuttamniitiise isa kixxe sinatiktano nitto imak rakkatefeni oomni meya beysa danotowa iyaattawa.

¹⁴ Nitto rakkatefeti kabaasik baasso otmaas nitto rakkoosik argasunak hash nitto otmaas baasso rakkooson argasunir sinun; es barik nitto ganeyaassi isa kixxe sina foona.

¹⁵ Esiis dey: «Akamanon zuuti barik aane fui'towa; garonon zuuti barik dey aane yo'uwa» yistera tichchenaasimatowa.

Tiitonawa Zomobaasakitona

¹⁶ Ta nittok safarefanaasne faaron Tiito dey nibbaassin nittok safaronak zagi Ha'oosik galata sinfawungwa.

¹⁷ Tiito nittoki yoonas basa teetni fiqadik giraktu kabire yeeteno inno barin shiipheni bar barkita.

¹⁸ Misirachchuni kaamaason makobaasik betekiristaniisikito zuuttambaase asiissi galatamto ayiisin barneen ane gafkuniwa.

¹⁹ Es baristan denalo es ayiis inno han ma'a wostooson Daamiisa ulfinak wostera zagifeni kabaasiknawa wostonik fa ma'a fiqadiniisonna makeni innoneen ane hamme es wostoosi arga sinanak betekiristaniisikitosin korterwa.

²⁰ Han asunik imtonak zuutte waagaason epha kunsifeni kabaasik isa wuzakne inno hamat-tonoynimato teetniison oodtifenir.

²¹ Inno alamaas Daamiisa sinak koi'ba sinnoy-naron asuni meeni sinak dey ma'ar sina wuzason zaguwa.

²² Showo wona showo ugnak fattantere chim sinne beste ayniisin Tiitoneen ane nittoki wosiniis es bari boor'awa, Bar nittoosta fa amantobaas akama sinna boor'a hash han wostooson argasunak fa safarbaas zeemotiistan akamawa.

²³ Tiitoni chowaason aruk sholsifaanane nittotin argasunak taneen ane wostet fe wostoni zoomotawa, Barneen ane yoosoni oom ayni meeni chowaasik sinfaanane baasso betekiristaniisikitoni edde sinne Kiristoosni ulfinaasik yerseterwa.

²⁴ Es bari boor'a keeshtannitiison baassok besuti; es barik keeshtannitiisewa nittoosta fa inno teetoniise ke'nor sina beybaason betekiristani-isikito zuuttambaase asik besutiwa.

9

Kiristanani Meyak Zagte Waagni Kisu

¹ Yuudak feese kiristanani meyak zagtefa waagni chowaasik nittok tichunak aane sholsifawa.

² «Akayak feese asuni meya aata woggaastan kabgire argasuk hoorere feeseterwa» yira Meqedoniyaki asuni meyak nitto chowaasik teetefanaas chimnittiison arifana boor'awa. Nitto chimaas oom asuni meyanon imosonek kabgiwa.

³ Han wuzaasik nittoosta fa inno teetoos ke'nor sinna fui'tonoynamato han ayni meyanon nittoki wosunawa. Nitto dey zeemoti ta makenaasimato hoorera odoti.

⁴ Meqedoniyaki asuni meya taneen ane nittoki yeeseфе kabaasik hooronoy diifeni biyefaатene inno nittoosta teetefeni teetoosik iichchenirwa, Nittonu akamanontu iichchotiwa.

⁵ Es bari boor'a imatik maketi kamnitiisimato es imaason zeemma hoossutik nittotin yaadas-susonek han ayni meya tayistan zeemme nittoki yoosone bar sholsu sinna taak bestewa. Es barik ta yaafana kabaasik imati imaas hoorera foona; nitto dey imatiis giddik sinnoynaron fiqadintiisik sinbaasontu besifa.

⁶ «Garonon buka bar garo meyatu zuutife; aka-manon buka bar akama meyatu zuutife» yiste baron yaadatoti.

⁷ Es bari boor'a Ha'o shunfanaas girak imfe barin sinna boor'a asu isarba isarbaasik nibbaassi imanак sholena baron girak imoteno ek hang uuk wedey giddik imanaata.

⁸ Wonna wonna wuza zuuttambaase asik teet-nitiison chimma ma'a wosto zuuttambaase asiista feeshu chimatik Ha'oos eebbabaason arkissira imanак chimanawa.

⁹ «Esiis dey tukamni meyak garamak imi; ookobaas dey koi'ba foontonon foona» yistera tichchenaasimatowa.

¹⁰ Bukfe barik zala; muuni barik tusha imfa Ha'oos bukati zalaason arkissira nittok imanawa; garamak imti imaasi gaananon dey arkissuna.

¹¹ Nitto imeti imaas innoki kamo imtona asuni meya zuuttere Ha'ooson galattosonek wonna wonna imatik Ha'oos wuza zuuttambesiise asik otum sinatik zagawungwa.

¹² Es imfeti imni wostoos kiristanani meyanon rakkoossin kisubaastan denalo asuni meya

Ha'oosik akama galata imosonek zagirwa.

¹³ Han nitto imfeti imni wostoos Kiristoosni misirachchuni kaamaasik ajajamera amanamto sinfaat baassok sinun oomiisik imetimato besuaasik zuuttambesiise Ha'ooson galattededifewa.

¹⁴ Baasso dey Ha'oos nittok imna akama otumbaastan kabi chowa nittotin keeshtesefe boor'a nittok shiiphsonewa.

¹⁵ Asuni kaamak wolumtonak chimtonoy bari imaasik Ha'oosik galata sinfawungwa.

10

Phawulos Ha'oosi Wostoni Chowak Imna Wolgu

¹ Ta Phawulos nitto sina faana kabaasik iichcher yisten. Sinuntano nittoostan wokfana kabaasik iichchonor yisten; Kiristoosni garamaasiknawa ma'aasikna nittotin shiiphefawungwa.

² Nittotin shiiphefanaas nittoki yaafana kabaasik digonoy makonak taan zagutikwa; sinuntano ashni safarak kutit faanir zagire safarsefe isa isa asuni meeni sinak digonoy makonak sholefawungwa.

³ Awune faaronnu han daasta faafenik neebefeni neeboos han daastaki neebosimatotawa.

⁴ Es neeboni meeniis dey gosmaason boganik Ha'oni hugnaba faanartano han daastaki neeboni meyasne faartawa.

⁵ Ha'ooson aruni chowaasta tuusa sinna kabifa we'nusewa beegantoose asin bogani; asusa safaranon zuutira boojera Kiristoosnik ajajamonak zaguni.

⁶ Nitto ajajamoos tuuma sinfana kabaasik ajajamo beyaason zuutira ke'uk hoorer siinani.

⁷ Nitto biifetiis geroiki bestefa baron koi'bawa; oonu ta Kiristoosnir yire barik amanefaanane hepsa wolfe safarowowa. Inno dey basaaysimato Kiristoosnir sinnimato yaadatowo.

⁸ Daamiis innok imna ha'suni hugnaasik akamanon teetefaanane aafawa iichchonawuza. Han ha'suni hugnaas innok imtenaas nittotin chinuniktano boganiktawa.

⁹ Wosinaasik nittotin deessunarne faar sinna nittok bestonaatawa.

¹⁰ Isa isa meya: «Phawulosni wosiyaasikito faya dey chimawa. Sinuntano bar teetbaasik innoneen ane feena kabaasik hopi wolumbaas dey kashistowa» yiset feeseter sinana.

¹¹ Es baron yisefe asuni meya inno woksok faagedo wosiyaniisik makefeni barewa tai'sonon nittoneen ane faagedo wostefeni bare asi ganesi oor oor kesba aafa sinbaason yaadatsotowa.

¹² Sinuntano teetbesiison galattesefe isa isa asuni meyaneen ane faadtonik wedey hoossunik aafa chimani wuza. Sinuntano baasso teetbesiison wolgire teetbesiisneen ane maazzanobesiisiknawa hoossubesiisikna baasso yaadatse asutewa.

¹³ Sinuntano inno nittoki kar'aninneen Ha'oos innok imna wostoosi dilaktu teetefenitano teetonik sholsistan denalo aane teetefeni.

¹⁴ Nitto dey faatiis inno wostoni dilaassi sinna boor'a Kiristoosni misirachchuni kaamaason asuk nittoki yaafeni kabaasik es dilaassin aane aatta keseniwa.

¹⁵ Es bari boor'a Ha'oos innok dilera imna

dilaastan aatta oomni meya wostesete wostoosik aafa teetoniwuza, Es baristan amantontiis dichanaknawa inno wostoos dey Ha'oos innok dila dila nitto ganeyaassi daysira tagunakna abdi zagidifeniwa.

¹⁶ Ese oom asusa wostoni dilasi girira zeemoti wosuste wostoosik teetonoy nittoostan ekalo faase daasikitosi misirachchuni kaamaason mako chimaniwa.

¹⁷ Sinuntano: «Teetefe bar Daamiisik teetowowa».

¹⁸ Esiis dey asu galata dananak chimfenaas Daamiis barin galattefena kabaasiktano asu bar barin wolgire galattefena kabaasiktawa.

11

Phawulosnawa Eshni Wosini Meena

¹ Garo gowwanaason taak fakusotimato abdi zagifawungwa; adarawa taan fakutiwa.

² Isa durba nawa durbummabaase feen teegoosik teegetefanaysimato ta dey nittotin Kirsitoosnik teegera duusina boor'a nitto chowaasik ayyanani koon koonefawungwa.

³ Zawaas mangubaasik Hewannon daagsinasimato nitto safaraas dey awuzakne mangira Kirsitoosnik fa ma'a dey kayma sina amanamtontiison beyatitto iyaat digefawungwa.

⁴ Isa asu nittoki yeere inno nittok makeni baron sinnoynaron oom Yesusnin nittok makefaanane wedey nitto ephpha taati Ayyanaason sinnoynaron ooma ayyana ephpha taasefaatine wedey

ephpha taati misirachchuni kaamaason sinnoy-naron ooma misirachchuni kaama ephpha taasefaatine shaakkira mertetiwa uwa.

⁵ Sinuntano ta han iny iny wosini meeni ganeyaassin isa wuzakne hater sinnaas taak aane bestefawa.

⁶ Wolumni techmaasik aru sina beyfanaknu aruna aane hatowa. Es baron dey showo ugnak nittok ammanon kisira makeniwa.

⁷ Ta Ha'oosi misirachchuni kaamaason damoza taak kaastonoy-naron nittok makonaasewa nittotin teggunak ta teetaason hatessunaase awuzakne boor'a sinna tayista faattetaaso?

⁸ Nittok wostok ooma betekiristaniisikitokin argasuni waaga ephnaasik baassotin bo'engwa.

⁹ Nittoneen ane faana rakko tayista kar'fana kabaasik Meqedoniyani yeese ayni meya taak sholsu sina wuza zuuttambaase asik argasit feeseter sinna boor'a ooniistanu aane ba'a sinut. Hash hawungneen kar'a nittoosta isa wuzakne aane ba'a sinut. Hanneennu nittoosta aafa ba'a sinanawuza.

¹⁰ Kiristoosni futoos tayissi foobaasik teetonoy-namato taan zaguniwuza Akayaki daastak oonu aafe.

¹¹ Es bar awuni boor'anso? Nittotin shuna bey-na boor'anoso? Nittotin shunfanamato Ha'oos arifawa.

¹² Ese oom wosini meya: «Inno baassosimato wostenir» yit teetese fe chowaason tishkuk hashti zagit faana baron hanneen dey zagunawa.

¹³ Es effetena asuni meya Kiristoosni wosini me-yane feer sinne bestok teetbesiison soolsefe eshtu wosinawa eeshshisefe wostinynyani meyanawa.

¹⁴ Es bar dey diinqisuni wuzatawa, Sexanaasnu chaarefani wosiya sinne bestok teetbaason sool-erwa.

¹⁵ Es bari boor'a han Sexanaasi wostinynyani meya ooko wostinynyani meyanon sinne bestok teetbesiison soolsefek aafa diinqisisuna wuza. Koi'baastak wostobesiisi waaganon danone.

Phawulos Wosi Sinna Boor'a Basaasta Kar'a Shana

¹⁶ «Ooniknu ta gowwane feer sinna barik bestonaata» yira hepsa dey makefawungwa. Gowwa sinna nittok bestefanaknu garonon teetonak gowwane feer zagira faadutiwa.

¹⁷ Esiisimato teetok makefana kabaasik es makefana bar Daamiisa fiqadinimato sinnoynamato gowwane feer sinnawa.

¹⁸ Showoni meya ashni chowaasik teetese fe boor'a ta dey teetefan.

¹⁹ Nitto techumniti faanar sintimato gowwani meyanon girak fakuti.

²⁰ Esiisimato oonu nittotin boznimato zagaanane; oonu nittooson meefaanane; oonu nittoyson basar zagaanane; oonu nittotin kashshifaanane; oonu gachnitiison bochaanane fakifeti.

²¹ Taan iishshunir sinfanaknu han wuzasikitonon zaguk chim sina beynimato nittok ammanon makonawa.

Sinuntano oonu chimme teetoniir feefaanane ta dey basaasimato chimma teetonawa. Es baron yifanaas hashnu gowwanimato sinnawa.

²² Baasso Ibrawini meyanoso? Ta dey Ibrawiwa. Baasso Israelni meyanoso? Ta dey

Israelawiwa. Baasso Abrahamni zalaaskinnoso? Ta dey Abrahamni zalaassinwa.

²³ Baasso Kiristoosni wostinynyanoso? Ta dey baassostan denalo Kiristoosni wostinynyawa. Han baron makefanaas nifasone feer sinnawa. Baassostan denalo showo wona wostok hopin, Showo wona taaten, Showo wona suusten, Showo wona kituta kar'in.

²⁴ Ayhudni meya uucha wolle keezasire izgine keezasire izginenon alanggak taan suusisete.

²⁵ Keeza wolla haarok ichchen. Isarga shu'ak ichchen. Keeza wolla Markabini adaga tayista kar'i; isa waalnawa isa wonne baariistatu faan.

²⁶ Ugunni kutunaasi aatamatak wor'a akani adaga dey bo'inynyani meeni adaga tayista kar'i. Ayhud sina ta keeniiskinnawa Aazabni meyakinna adaga tayista kar'i, Katamaassinawa zaboossina dey baaristan adaga tayista kar'i. Esiisimato dey esh amanyinyini meyakina adaga tayista kar'i.

²⁷ Showo wostonewa hopine tayista faar. Showo wona afay'ni turkin, Makaknawa akani iktanakna rakkaten. Showo wona muu turkin. Koochonewa atatu kutune tayista kar'i.

²⁸ Oomasonneen zuutira faadunoy betekiris-taniisikito zuuttambaase asi chowanon wonna wonna safarok rakkatet faanar.

²⁹ Isa asu hopifena kabaasik ta dey ane hop-unoyna wona aagenso? Isa asu boor'aasik tu-usa'efena kabaasik ta dey haaronoyna wona aagenso?

³⁰ Teetok sholsir sinfaanane ta teetonaas hopinaason besifa wuzaasikitokwa.

³¹ Koi'ba foontonon galatba faana Daamni

Yesusni Aba Ha'oos ta aafa eshana wuza sinnamato arifawa.

³² Demaskoni katamaassi faana kabaasik taato Aretaasni ha'suni sikalosi fe ha'sinynyaas taan ephphe taar'anak sholefaat katamaasi finynyanon tasoni meyak oodsit feer.

³³ Sinuntano asuni meya masasi duusire ojaasi maskotisi kamo kessiseten es ha'sinynyaasa kushusin aatta kesin.

12

Phawulosni Raa'i

¹ Awune faaron teetoos ke'ana wuzba tish-fanaknu teeto sholsifaanane Daamiis taak imna ammanon besina wuzaasewa raa'ise asik teeton-awa.

² Kiristoosnir sina isa asunin arifawungwa, Es asus asire acheechche wogganeen sinak keessa samaasta oottere hamme kar'i, (Oottere hamnaas dey ashbaasnengwa wedey aaneto? aane arut, Ha'oostu arifar.)

³ Sinuntano es asus oottere hamnamato arifawungwa. Ashbaasnengwa wedey aaneto? aane arut, Ha'oostu arifar.

⁴ Bar genneti oottere hamme asuni kaamak maktoknawa asu wollonakna chimnoyna wuzason ode.

⁵ Es effetenasne fe asusiktu teetona, Sinuntano ta chowaasik hopinaastan ooma teetona wuzna aafawa.

⁶ Eekan ta futooson makefana boor'a teetonak sholefaanane gowwa aafa sinanawuza. Sinuntano oonu tayistan biina baristannawa taakin dey odena baristanna denalonon gimmiti imnoynamatowa iyaat teetoson beyfawungwa.

⁷ Han taak ammanon kessa beste inya inya wuzasikitotan kabi chowa teetera ge'noynamato ashnaason ser'nimato kejni shana taak imte, Es bar dey Sexanaasi wosiya sinna taan kejja rakkisit ge'noynamato zagifa.

⁸ Han bar tayistan kabunak Daamiiski keeza wolla shiiphen.

⁹ Sinuntano bar: «Ta hugnaas ma'sira neyista wostonaas ne hopiyaski kamo sinna boor'a otumnaas neek hooronawa» yi. Es bari boor'a Kiristoosni hugnaas tayissi foonak aagenu sinfanak hopinaasik giret teetonak sholefawungwa.

¹⁰ Ta hugna danfanaas hopifana kabaasik sinna boor'a Kiristoosnikwa iyaat hopifana kabaasik, mechefana kabaasik, rakkatefana kabaasik; kabugtefana kabaasik; shana biifana kabaasiknatu girefawungwa.

Phawulos Qoronxosuk Feese Asuni Meyak Safare

¹¹ Gowwanimato sinin! Ekka sinanak zagiis nittowa, Baak sinfaanane ta chowaasik makoniis nittowa, Ta oo sinnamato artonoy asu sinfanaknu arto yiste wosini meyaastan isa wuzaknu aafawa hatona wuza.

¹² Ta futoni wosi sinnaason assifa wuzaasikito mallatoosewa diinqi wuzaasikitone dey biistera artonoy wuzaase ta nitto ganeyasi faana kabaasik fakiyak wostena wostoosikitowa.

¹³ Nittoosta ba'a sinnoy foonastano ooma betekiristaniisikitosin nittotin awukinso hatessinari? Es bar dey mangsu sinna bestefaanane taak feeshun utiwa.

14 Nittoki yoonak hoorere kabunaas haniis keezsawa. Ta nittoosta ba'a sinanak aane sholefatwa, Ta nittokin sholefanaas nittotintano waagnitiisontawa. Naanggotbesiisik otma zuuttusonek sholsifanaas kooni abaasnawa intosetano naanggotaas kooni abaasiknawa intoosikna otma aane zuutifa.

15 Nitto chowaasik waagnaason koi'batawa teet-naasonnu aatira imfaanane akamanontu taan girsifawa, Eekan ta effaron nittotin shunnaneen nitto taan shunatiis kiiskunonnoso?

16 Es bar sinun han bar sinfanak ta nittoosta ba'a aane sinutwa, Eekan jallisuknawa eeshshukna nittotin ajajenarne faar sinnatu nittok bestefa.

17 Nittok wosini asusasin isaaski kamonu eph-pha taak ke'inoso?

18 Tiito nittoki yoonak shiiphengwa, Es ayni-isin dey barneen ane wosin, Eekan Tiito nittokin bo'ewoso? Taanawa barna nittok wosteniis isa Ayyanaasiktanoso? taaruniis dey isartanoso?

19 Nitto zuuttamnitiise hashneen kar'a safaret faasetiis inno nitto sinak inno chowaasik teetni-ison oodak tugga'et faanir zagiranoso? Inno Kirs-toosniissi faafaat makefeniis Ha'oosi sinakwa. Koontaasakitono! Inno han baron zuuttira maket faaniis nittotin chinunik iyaatwa.

20 Ta nittoki yaafana kabaasik awuzakne nitto taak sinatik sholefanaaysimato sinnoytiron, Ta dey nitto sholefetiisimato sinnoynaron uphonitto iyaat digefawungwa, Esiisimato nittokik faasso, koona, gi'a, manguk kabu, asuni sunni mangsu, asunin hamato, beegantonewa sasne foonitto iyaat digefawungwa.

21 Hepsa wola nittoki yaafana kabaasik

Ha'onaas awuzakne nitto sina taan salpisunitto iyaat digefawungwa, Zeemo sinak boor'a wostesere, es wostesete ziinaasik, gerkesete barik, gafo sinobesiisik harmu beya asuni meeni boor'a suumonatto iyaattu digefawungwa.

13

Koi'ni Kiitonewa Nagani Ooshshone

¹ Ese nittoki haniis keezsa wolle yoonawa, Aa-genu chowa zuuttambaase futo sinnedato arte-fanaas hep wedey keez zaalnikwa.

² Hepsa wolla nittotin biyanak yaana kabaasik teetnitiison oodatik makera faanar, Hashnu dey woksook faafaat zeemoti boor'a woste baassoknawa oomni meyakna teetbesiison oodosonek makefawungwa, Hash nittoki wolla yaafana kabaasik ooniknu aafa kenashtona wuza.

³ Esiis dey taaki kamo makefees Kiristoos sinbaason gasasuk sholontiisikwa. Bar nitto ganeyaassi hugnaba feenarteno hopitewa.

⁴ Bar maskalista suuttere kitinaas hopiyak sin-fanaknu hash Ha'oosi hugnak hayew sinne fewa. Inno dey barneen ane hopi sinniwa; Sinuntano nittoneen ane fa isarniisik barneen ane heyew sinna foonirwa.

⁵ Amantontiisik zag sinnitiison arusotik teetniti-ison biitiwa, Teetnitiison fattanoti, Yesus Kiristoos nittoossi feenamato aane gasasuwetinoso? Es bar sina shakaanane fatanaasik gandetiwa uwa.

⁶ Inno fatanaasik gando beynison gasasutimato abdi zagifeniwa.

⁷ Mangu wuza zagunoytimato Ha'ooski shiiphe-feniwa, Es shiiphefeniis dey awune faaron inno

chim sinna besto beyfeniknu nitto wonna wonna ma'ar sina wuzason zagusotiktano inno chim sinniison nittok besuniktawa.

⁸ Inno futoni chowaasiktu wostefenitano futosneen ane isar sinnoywuza aane wostefeni.

⁹ Sinuntano inno hopi sinfaani nitto chim sinefeti kabaasik girefeniwa, Inno shiiphoo nitto yo'unti foonto sinatikwa.

¹⁰ Han wosiyaason nittoostan wokka faagedo tichinaas es bari boor'awa, Es barik ta nittoki yaafana kabaasik Daamiis taak imana ha'suni hugnaasik nittotin aafawa rakkisunawuza, Daamiis ha'suni hugna taak imnaas nittotin chinunaktano nittotin boganaktawa.

¹¹ Koi'baastak aytaasakitono! Maar'ongwa; faati foontiison mai'sutiwa, Kiitonaason ephpha-tooti, Nittotna nittotna isar sinti, Nagak dey foosoti, Keeshtanni Ha'oosewa nagani Ha'oose nittoneen ane sinana.

¹² Korto daamok wol daameset naga ooshshosoti,

¹³ Amanynyini meya zuuttere naga nittok wosisete.

¹⁴ Daamini Yesus Kiristoosni otmaas, Ha'oosi keeshtana, Korto Ayyanaasi isar sina nitto zuutamnitisneen ane sinfawungwa.

Gaddo Teyya
The New Testament in the Yemsa language of Ethiopia,
Latin script

copyright © 2025 The Word for the World International

Language: (Yemsa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-06

PDF generated using Haiola and XeLaTeX on 19 Dec 2025 from source files dated 6 May 2025

7608a66e-9602-5623-89f0-436ebf008df3